

大明太宗文皇帝實錄



UNIVERSITY OF TORONTO LIBRARY



大明太宗體天弘道高明廣運聖武神功純仁至孝文皇帝實  
錄卷之三十六



監修官奉天靖難推誠宣力輔運武臣特進光祿大夫左柱國太師英國公臣張輔

榮祿大夫少師兼吏部尚書臣蹇義榮祿大夫少保兼太子少傅戶部尚書臣夏原吉

總裁官榮祿大夫少傅兵部尚書兼華蓋殿大學士臣楊士奇資善大夫太子少傅工部尚書兼謹身殿大學士臣楊榮

資善大夫太子少保禮部尚書兼武英殿大學士臣金鉉資善大夫戶部尚書兼謹身殿大學士臣陳山

資善大夫禮部尚書兼華蓋殿大學士臣張瑛嘉議大夫太常寺少卿兼翰林院學士臣楊溥等奉

勅修

永樂三年秋七月甲午朔享



太廟○遣官祭歷代帝王陵寢○夜有星如彈丸大流五尺許  
發光大如雞子赤色有尾光燭地出勾陳旁西北行至紫微  
西蕃外○丙申賜書諭趙王高燧曰邊報西北屢有火此或  
鬼力赤與瓦剌戰徙而南來恐我軍逼之故發火以張其勢  
又或前者馬剌沙等來歸中途驚回今欲再來故發火爲約  
爾即於馬軍內無選漢韃六十人令的當指揮二人率往西  
北以覘虜情降者招之若其入寇則與邊將籌議相機襲之  
所遣官軍令晝伏夜行慎密慎密○丁酉設算子坪長官司  
隸湖廣都司答意治古寨二長官司隸貴州宣慰司時辰州



衛指揮僉事龔能等招諭草子坪等處三十五寨生苗龍廖彪等四百五十三戶向化廖彪等各遣子來朝請設官撫治上曰苗蠻能慕義求內屬宜從其意遂命設長官司以廖彪爲草子坪長官各野爲答意長官龍答哥爲治古寨長官俱給印章賜冠帶襲衣鈔幣仍命蠲其民租徭復設陰隆江滑石江二巡檢司隸草子坪長官司以苗首廖喬勝等爲巡檢○戊戌陝西興平鳳翔二縣進瑞麥三十本禮部率羣臣上表賀以爲

聖德覆被之應天下太平之徵



上覽之謂尚書李至剛侍郎趙玘曰瑞麥固是嘉應但四方遠  
邇靡一物不得其所斯可爲太平。今中外果無匹夫匹婦之  
愁怨於下者乎。覽表祗益慚愧耳。君臣貴相與以誠。諛佞非  
治世之風也。至剛等愧謝。○雲南寧遠州土官同知刀吉罕  
叔刀孟賁等來朝。貢方物。賜刀吉罕誥命信符金牌。及紵絲  
衣一襲。紵絲紗羅六匹。并賜刀孟賁等鈔。○己亥。順陽王有  
烜辭歸。就以所獲周府擾害官民千戶費誠。舍人曹政等付  
歸周王自治。且賜書周王。櫛曰。比者自汴至淮及江一路多  
有賢弟護衛人拘軍民商旅之舟裝運王府米麥等物。肆擾



不一。又有逼脅郡縣官吏和買茶芽者。有司苦之。非宗藩美  
事。賢弟宜深戒戢之。庶幾有以表率宗室。○浚淮安府山陽  
縣運鹽河計一十八里。○辛丑夜月入氐宿。○壬寅以周王  
橚生日遣駙馬都尉沐昕賜綵幣羊酒良馬。○戶部尚書郁  
新奏官民雜犯死罪以下。舊令於北京納米贖罪。今議莫若  
量增其米。雜犯死罪納米百一十石。流罪三等八十石。加役  
者九十石。徒罪三年者六十石。二年半五十石。二年并遷徙  
者四十五石。一年半三十五石。一年三十石。杖罪九十一百  
俱二十五石。六十至八十二十石。笞罪十石。聽於京倉輸納。



爲便從之。○韃靼平章把都帖木兒倫都兒灰自塔灘率部屬五千餘人詣甘肅歸附。總兵官左都督宋晟留其家屬於甘肅遣人送把都帖木兒等至京。

上宴勞之。賜襲衣等物。○癸卯命把都帖木兒爲右軍都督僉事。賜姓名吳允誠。倫都兒爲後軍都督僉事。賜姓名柴秉誠。保住爲陝西行都司都指揮僉事。賜姓名楊效誠。餘爲指揮千百戶。鎮撫復賜冠帶襲衣文綺表裏白金鈔有差。○以房安爲監察御史。安洪武中自御史陞江西按察使。坐罪爲民。至是工部尚書宋禮薦其才。故召用之。○賜書周王橚曰。



比各府縣錄周府長史司榜文來奏。夫朝廷與王府事體不  
同。長史司專理王府事。豈得遍行號令於封外與朝廷等一  
家有一家之尊。一國有一國之尊。天下有天下之尊。卑不踰  
尊。古之制也。今賢弟居國如諸子。擅行號令於國內。其亦可  
乎。若姦人造此離間。即具實以聞。當究治之。如實賢弟所命  
則速遣人收還。仍嚴戒長史行事存大體。毋貽人譏議。○甲  
辰遣行人聶聰等齎勅諭安南胡奩曰。阮景真等來得奏具  
悉。朕惟

天地生物出於至誠。聖人代天理物亦以至誠爲本。故其下皆



以誠應朕用此道君臨萬邦推心待人無間遠邇然慮爾習於變詐或未盡誠今復遣人諭爾爾果誠心應朕盡革前非迎還天平以君事之朕當建爾上公封以大郡傳之子孫永世無窮朕之斯言上通於天佇俟來章以頒顯命遂遣景真等與聰俱行○修浙江海寧湖州二守禦千戶所城池○夜有星如盞大青白色有尾光燭地出扶筐西北行入天棊○丙午暹羅國王昭祿羣膺哆羅諦刺遣使曾壽賢等來朝貢方物賜鈔及金織紗衣○老撾軍民宣慰司宣慰使刀暹答遣頭目渾典等來朝進象及方物賜刀暹答鈔五百五十錠



綺帛各三十六匹。并賜渾典等鈔幣有差。○丁未。徙府軍右衛治于鼓樓之西。舊治在西安門外。以拓皇牆故徙之。○夜有星如盞。大光明有尾。出北斗魁外。西南行至玄戈傍。○戊申。遣官祭中山武寧王。

上諭禮部臣曰。中山王勲德之盛。國朝第一。當百世不忘。自今正旦。清明。七月望。十月朔。冬至。皆遣祭。著爲令。○雲南元江府知府那榮來朝。貢馬及方物。賜之鈔幣。○己酉。遣右軍都督僉事吳允誠。後軍都督僉事柴秉誠。并其部屬都指揮指揮千百戶等居涼州。賜賚甚厚。諭兵部令榜諭緣邊將士。毋



有侵擾賜勅嘉獎總兵官左都督宋晟招懷之功并賜之鈔幣仍命晟給與允誠等牛羊孳牧都督牛二十羊一百五十都指揮牛十四羊七十指揮牛十二羊六十千百戶衛所鎮撫牛十羊五十其隨來軍民每戶牛六羊二十家屬給衣鞋布鈔有差且令晟加意撫綏俟允誠等居處既定選其中壯勇或二百三百五百參以官軍三倍於塞外偵邏非但耀威亦以招徠未附者○勅寧夏總兵官左都督何福曰近鞬官把都帖木兒等歸附其部屬五千餘人駝馬二萬餘匹皆留甘肅把都帖木兒等賜之姓名優與爵賞令率其部屬於涼



州居住。給與牛羊孳牧。今以所給牛羊之例付爾觀之。自今爾處有歸附者。給與如例。朝鮮國王李芳遠遣陪臣尹穆等奉箋賀。

皇太子千秋節。賜穆等鈔幣有差。占城國王占巴的賴遣使部該卓等來朝貢方物。賜賚有差。真臘國遣使柰昧等來朝貢方物。且告其國王參烈婆毘牙卒。賜柰昧等鈔幣有差。○修後湖黃冊庫。○巡按廣東監察御史汪俊民言瓊州府周圍皆海中。有大小五指黎母等山。皆生熟黎人所居。比歲軍民間有逃入黎峒。甚至誘引黎人侵擾居民。今朝廷遣



使招諭臣愚以爲黎性頑狠招諭之人非其同類未易信從。又山水峻惡風氣亦異中國之人。惟其瘴毒鮮能全活。臣訪得宜倫縣熟黎峒首王賢祐舊嘗奉命招諭黎民信從歸化者多。況其服習水土不畏瘴癘。臣請追還使命仍召賢祐至京量授以官。俾招諭未服黎人戒約諸峒無納逋逃。其熟黎則令隨產納稅。一切差徭悉與蠲免。生黎歸化者免其產稅三年。峒首則量所招民數多寡授以職事。如此庶幾黎民順服從之。○庚戌旌表安慶府懷寧縣民方福一妻王氏。潛山縣民葛晟妻金氏。朱得進妻王氏。青州府臨朐縣民張仲先。



妻齊氏。太原府徐溝縣民。武志賢妻。蘇氏。撫州府樂安縣民。  
黃克敬妻。殷氏。吳原得妻。黃氏。黃仲逸妻。宋氏。臨川縣民。饒  
伯振妻。劉氏。支得誠妻。徐氏。韓伯遜妻。丁氏。趙伯達妻。婁氏。  
吳伯詠妻。鄧氏。四川叙南衛知事。史彥妻。劉氏。太原府徐溝  
縣主簿。龔名妻。石氏。臨洮府蘭縣民。徐人得妻。孟氏。廣信府  
永豐縣民。王復初妻。傅氏。傅彥恭妻。徐氏。鄭友東妻。劉氏。上  
饒縣民。張繼成妻。江氏。平陽府平陸縣民。姜舉人妻。蕭氏。故  
元鎮撫。陳州馬士隆妻。左氏。梧州府藤縣民。王克讓妻。龍氏。  
貞節俱以蚤喪夫守義無瑕。有司以聞。故並旌之。○命平江



伯陳瑄於天津衛城北造露囤千四百所。儲海運糧。○辛亥。遣序班王孜祭故真臘國王參烈婆毘牙。命給事中畢進內使王琮齎詔封故真臘國王長子參烈昭平牙爲真臘國王。仍賜之鈔幣等物。遣其使索昧等還。○賜雲南元江府知府那榮金帶一文綺衣三襲錦十八匹。銀百五十兩。鈔六百錠。并賜其僉從鈔幣有差。遂陞本府爲元江軍民府。給之印信。○工部尚書宋禮言。燕山右衛吏趙成。告犯笞罪。無力准工。自願北京爲民種田。命戶部依例給牛具種子。自今有犯笞罪。無力准工。悉如之。仍勅杖罪八十以上。即時發遣。七十以



下放還鄉里備貲自詣屯所○壬子車里宣慰使刀邏答遣  
頭目攬線思奏請舉兵攻八百大甸宣慰使刀招散

上賜勅諭曰覽奏具悉卿之忠義八百小醜負朝廷恩信肆為  
慢侮阻遏使臣公義之所不容朕為天下生民主體上帝好  
生之德一民失所朕為不寧彼八百之為不善不過首領數  
人其下軍民皆朕赤子兵行之際寧無多傷且其土官幼弱  
無知多因姦邪小人教誘所致今已遣使諭令改過遷善且  
索其惡黨孟孟乃朋等爾今即先遣人往波勒木邦孟良等處  
諭朕之意若八百大甸仍昏迷不悛或姦邪之人執送不盡



爾等即合兵征之。但禽其首惡而撫安其衆。無多殺戮。仍擇其支屬賢者奏聞立之。若其悔過服罪。即止兵勿進。又遣使諭八百大甸軍民宣慰使刀招散等曰。朕特頒金字紅牌勅諭與諸邊夷爲信。以禁戢邊吏生事擾害。用福有衆於無窮。其車里老撾木邦孟養諸宣慰使及孟定威遠等府州官皆敬恭朝命。無所違禮。惟爾年幼無知。惑於小人孟乃朋孟允公等教誘。啓禍生釁。聞使臣至境。拒卻不納。朕遣使頒詔往諭古剌等處。爾阻遏之。爾之罪愆不可悉數。廷臣式請興師問罪。朕念八百之人。豈皆爲惡。兵戈所至。必及無辜。故有所



不忍。茲特遣司賓田茂推官林禎齋勅同車里差去人往諭。爾能改過自新。即將姦邪之人禽送至京。庶幾境土可保。人民獲安。其或昏迷不悛。發兵討罪。孥戮不貸。遂勅西平侯沐晟諭以車里請征八百之故。且言已遣使往諭八百令改過自新。爾宜嚴兵以待。彼果悔罪輸誠。即止兵勿進。其以馬軍六百步軍一千四百隨內官楊安郁斌。又慮老撾乘車里空虛。或發兵掩襲其後。或與八百爲援。可選的當頭目率兵一萬五千往備。○癸丑。設孟艮府隸雲南都司。以歹指土官刀哀爲知府。給印誥及賜冠帶。時刀哀遣人來朝。請設治所。故



有是命○陞都指揮同知郭贊爲四川行都司都指揮使都  
指揮僉事黃寶爲都指揮同知○除蘇州崑山縣荒田租二  
萬七千七百石有奇○甲寅賜朝鮮國使臣及雲南元江府  
等處土官老撾軍民宣慰使司頭目宴○福建都指揮使張  
鑑領兵捕倭私受賂○又縱所部掠民財謫成永平○乙卯  
命東宮儀仗增製金鉦紅鼓各二○元江軍民府知府那榮  
請躬率兵及餽運往攻八百

上嘉勞之○夜有星如蓋大青白色尾跡有光出土司空傍東  
南行後一小星隨之○丙辰



皇太子千秋節。文武百官早朝畢。具朝服赴文華殿行賀禮。  
○太原左護衛總旗孟全等聚眾謀叛。事覺伏誅。○丁巳。陞  
雲南寧遠州土官同知刀吉罕爲本州知州。○戊午。以守城  
功陞宛平縣知縣賀銀爲通政司右參議。○改江西道監察  
御史汪俊民爲刑科給事中。○雲南元江軍民府奏石屏州  
洛矣橋每歲江水衝壞。止令本府修理。民力不堪。乞命石屏  
州相兼修治。從之。○夜有星出羽林軍。大如彈丸。流丈餘。發  
光如雞子。太青白色。尾跡有光南行。○庚申。改工部左侍郎  
張思恭爲北京行部左侍郎。初思恭坐事。命督修天津衛城。



至是還奏稱旨遂改官行部仍令督修天津衛城○壬戌酉  
羌酋長鎖南等率衆來歸

大明太宗體天弘道高明廣運聖武神功純仁至孝文皇帝實  
錄卷之三十六



大明太宗體天弘道高明廣運聖武神功純仁至孝文皇帝實  
錄卷之三十七

監修官奉天靖難推誠宣力輔運武臣特進光祿大夫左柱國太師英國公臣張輔

榮祿大夫少師兼吏部尚書臣竇義榮祿大夫少保兼太子少傅戶部尚書臣夏原吉

總裁官榮祿大夫少傅兵部尚書兼華蓋殿大學士臣楊奇資善大夫太子少傅工部尚書兼謹身殿大學士臣楊榮

資善大夫太子少保禮部尚書兼武英殿大學士臣金幼孜資善大夫戶部尚書兼謹身殿大學士臣陳山

資善大夫禮部尚書兼華蓋殿大學士臣張瑛嘉議大夫太常寺卿兼翰林院學士臣楊濟等奉

勅修

永樂三年八月甲子朔○丁卯遣官釋奠先師孔子○戊辰



祭

太社太稷○禮部尚書兼左春坊大學士李至剛有罪下獄○  
戶部尚書郁新卒。新鳳陽臨淮人。洪武間以才舉授戶部度  
支主事。陞郎中。尋擢左侍郎。新長於計算。每奏事稱旨。歲滿  
陞尚書。至是以疾卒。

上輟朝一日。賜祭命有司治喪葬云○浙江杭州等府仁和等  
縣水滄民田七十四頃四十六畝。漂廬舍千一百八十二間。  
溺死民男女四百四十一口○己巳。

上諭禮部臣曰。學校育才以資任用。



太祖高皇帝內設國子監。外設府州縣學。選用師範。教育俊秀。嚴立教法。豐廩蠲徭。期待甚至。建文以來。學校廢弛。所司又不督勵。虛糜廩祿。爾禮部宜申明舊規。俾師教無闕。士學有成。庶幾國家得賢材之用。

○迺北韃靼闊兒不花等二十五人來朝。賜鈔及文綺襲衣。

○庚午。兵科給事中楊勉言。北京驛路。安德至磚河五驛。乾寧至潞河七驛。各有船五艘。不敷遞送。宜令有司增設。其驛夫役滿久不得代者。多有逃亡。宜令法司將見問徒罪囚人。編發均派各驛買船遞送。

上從其言。○辛未。遣給事中周讓等往賜孟養軍民宣慰司及



大古刺。小古刺。底馬撒茶山孟倫等處土官文綺綵帛等物。  
○修浙江定海衛霽衢千戶所城池。○壬申。陞錦衣衛指揮  
同知陳敬為陝西行都司都指揮僉事。○苦野木等處女直  
野人頭目虎失木等三十九人來朝。賜鈔幣有差。○應天府  
鄉試。奏請考試官。

上命翰林院學士王景侍讀學士王達考試。賜宴于本府。○癸  
酉。命自今行太僕寺卿丞考滿。從都察院考覈。吏部覆考黜  
陟。○甲戌。祭太歲風雲雷雨嶽鎮海瀆山川等神。○遣官祭  
旗纛。○丙子。兀者衛別里哥禿等來朝。命設兀者揆野木千



戶所。以別里哥禿等九人為千百戶。賜誥印冠帶襲衣鈔幣有差。○丁丑旦。老人星見南極。其色黃潤。○命李真襲故兄金吾右衛指揮同知李義之職。楊敬襲故父金吾左衛指揮僉事楊貴之職。○修福建之建寧左右延平汀州四衛。及將樂守禦千戶所城池。○修會同館。時四夷朝貢之使充溢館舍。命併烏蠻驛入之。○辛巳。遼王植來朝。宴于華蓋殿。賜其從官宴如例。○苦溫都魯河鞬鞞頭目乞列門遣人歸附。○野人地面赤不罕達魯花赤察不赤安你女兒哈等百九十人來朝貢馬。賜鈔幣有差。○夜月犯天囷西南星。○壬午。永



興王尚烈來朝。命皇太子宴於文華後殿。○癸未。勅甘肅總兵官左都督宋晟曰。比聞韃官伯客帖木兒率衆來歸。可遣人慰撫。導之入境。然須密察其實意。若有詐謀。易為制馭。語云。受降如受敵。不可不慎。○山東布政司言。濟南等府淄川等縣。蚘蚘生。命速捕。瘞。○甲申。吉兒伐里女直野人頭目買罕等來朝。命買罕等為福山衛指揮千百戶。鎮撫等官。賜襲衣及鈔幣有差。○丙戌。山東青州中護衛軍潘玉奴妻王氏一產三男。禮部以聞。命循例給賜米鈔。○文武羣臣交章劾奏順昌伯王佐鎮守雲南。擅作威福。贓賄巨萬。宜明正其罪。



徵佐下獄○丁亥遼王植辭歸宴如初至賜之鈔幣并賜其  
從官鈔有差○戊子改兵部左侍郎喬穩為北京行部左侍  
郎○召張定為河南道監察御史定嘗為雲南左叅政坐罪  
謫山東驛夫至是有薦其才者故召用之○移應天府溧水  
縣東埧批驗鹽引所于新河口○增置北京順天府稅課司  
副使二員○己丑永興王尚烈辭歸宴如初至賜之鈔幣其  
從官賜鈔有差○韃靼失兒哈達兒等來朝命設赤不罕衛  
以失兒哈達兒等為指揮千百戶并賜誥印冠帶襲衣及鈔  
幣有差○庚寅夜有星大如彈丸青白色有尾出天倉流丈



餘發光如雞子大東南行二小星隨之○壬辰雲南鎮沅州  
知州刁平率其子來朝貢方物賜鈔五百錠文綺表裏五十  
匹○廣西田州府知府岑永通遣其子貢馬及方物賜之鈔  
幣○車里宣慰使刁暹答遣人貢金銀器及方物謝賜誥命  
勅符命賜鈔幣○女直野人頭目可憐哥歹顏哈等四十九  
人來朝命設屯河安河二衛以可憐哥等為指揮千百戶衛  
所鎮撫賜誥印冠帶襲衣及鈔幣有差

九月癸巳朔蜀世子悅爌來朝命皇太子宴於文華後殿其  
從官宴於西廡○慶王榘長子生賜名秩燿○賜西洋爪哇



車里元江朝貢使臣及舊港等處頭目宴○甲午。

上以海外諸番朝貢之使益多命於福建浙江廣東市舶提舉司各設驛以館之福建曰來遠浙江曰安遠廣東曰懷遠各置驛丞一員○設陝西寧邊黑山三岔三驛隸鎮番衛鎮遠平樂泉水通源四驛隸鎮夷守禦千戶所○除鎮江府丹徒縣坍沒田稅百一十一頃有奇○乙未雲南赤水鵬巡檢司巡檢速魯麻來朝貢馬賜之鈔幣○夜有星如盞大青白色光燭地出北斗魁外北行二小星隨之○丙申擢甄庸為山西道監察御史庸嘗為松江府知府有廉名坐累降右軍都



督府經歷。又坐累被謫。至是有薦之者。故擢用之。陞山西道  
監察御史周新為雲南按察使。浙江按察司經歷王著為副  
使。廣西按察司經歷萬子雅為僉事。○復陝西都指揮使孫  
霖官。○廣西東蘭州知州韋萬目遣人來朝貢馬。命賜萬目  
鈔幣及所遣人鈔各十五錠。○丁酉。陞河南都指揮使金玉  
山西都指揮使歐陽青為中軍都督僉事。大寧都指揮同知  
柳升為左軍都督僉事。遼東都指揮同知呂毅為前軍都督  
僉事。陝西都指揮同知趙忠脫列于為後軍都督僉事。脫列  
于食祿不視事。○命戶部覈實蘇松嘉湖杭常六府被水災。



民悉免其今年租稅凡免三百三十七萬九千七百石有奇

○夜有星如雞子大青白色有光出郎位東北行至近濁○

己亥改刑部尚書鄭賜為禮部尚書吏部左侍郎陳洽為大理寺卿陞大理寺卿呂震為刑部尚書○陞散騎舍人朱禿

兒為錦衣衛指揮僉事賜金帶食祿不視事○遣行人連迪

等齎勅往諭速覩嵩及西裏帳土官板洋等并賜之織金文

綺綵絹○庚子款多倫地面韃靼納哈刺等來朝貢馬賜之

銀鈔綵幣○辛丑賜周王橐書曰比浙江布政司言王府所

遣內官擅調湖州官軍及用箭鏃燒烙無罪人凌駕有司虐



害百姓。執其人送京。不審果是王府所遣。抑亦有司誣之。已遣人往府中詢其實。所繫三十餘人。今死已數人。而報不至。若復數日不報。死者益多。此事終何以明也。○重陽節。賜文武羣臣宴。○降右軍都督僉事馬溥為陝西行都司都指揮同知。○壬寅。命楚王楨冠其子景陵王子孟炤。○陞錦衣衛千戶掃忽兒察思吉朶羅赤俱為本衛指揮僉事。○癸卯。蘇門答剌國酋長宰奴里阿必丁滿刺加國酋長拜里迷蘇刺古里國酋長沙米的俱遣使隨奉使中官尹慶朝貢。詔俱封為國王。給與印誥。併賜綵幣襲衣。○指揮丁能杜福等撫諭四



川亞堅等十一寨生苗百三十六戶向化。認納黑鉛洞布。且各遣其土酋來朝。

上以苗人叛服不常。命悉隸酉陽宣撫司管屬。免其賦役。其自願納黑鉛洞布者皆免。賜其來朝土酋鈔幣襲衣遣還。○甲辰。修國子監祭器。○夜有星如雞子。大青赤色。光燭地。出天廚西北。行入天棊。一小星隨之。○乙巳。屢有告齊王搏不法者。至是賜搏書曰。比數有人言王過失。以兄觀之。王豈有他也。但由性躁急。下人不能堪耳。今兵荒之餘。民始蘇息。宜重加愛恤。何忍復苦之。且所當深慮者。刑罰太過。將左右之人。



或萌不測。噬臍無及。古人覆轍可爲鑒戒。前後來言王者。兄  
皆不遣還。亦以此耳。繼今宜涵養德性。寬以馭下。用保始終。  
如王有遷善之美。俾兄亦全友愛之道。顧不偉歟。○丙午。以  
韃官李丑驢爲遼東都指揮僉事。○丁未。韓王松第四子生。  
賜名冲燹。○戊申。谷王穗來朝。宴于華蓋殿。賜其從官宴於  
中右門。○賜暹羅等國使臣及回回沒哈麻的等百七十五  
人。織金紵絲羅絹衣五百襲。○己酉。冊左軍左都督劉貞孫  
女爲蜀世子悅嬪妃。○庚戌。免山西解州聞喜縣荒地稅糧  
四千六百七十三石。○夜月犯畢宿右股北第二星。○辛亥。



谷王穗辭歸。宴如初。至。賜賚視諸王特厚。

上親送之三山門。其從官賜鈔有差。○谷王穗第三子生。賜名

賦煇。○河南夏邑縣言官地十六頃有奇。久荒而稅額未除。

上命戶部除之。仍令募民耕種。三年後同民田起科。○夜月犯

天關星。○癸丑夜月犯天罇西星。○甲寅。陞鴻臚寺序班王

七十五為本寺左寺丞。以其諳通北虜語言文字。故進用之。

○乙卯。擢王平為福建布政司左叅政。陞山東道監察御史

房安為右叅政。刑部郎中李觀為福建按察使。戶部郎中陳

思聰為副使。刑部主事沈全為僉事。河南道監察御史張定



為廣東布政司右叅政汾州知州紀正為廣東按察副使平  
嘗任都察院左僉都御史坐事黜降天津左衛經歷至是以  
薦復召用之○以左軍左都督劉貞子俊襲金吾後衛指揮  
使○瓜哇國西王都馬板遣使八智陳惟達等奉表貢方物  
時其傍近碟里日夏羅治金猫里三國各遣人以方物同瓜  
哇使者來貢俱賜文綺襲衣○丁巳楚世子孟烷來朝命皇  
太子宴於文華後殿其從官宴於西廡○徙山西太原平陽  
澤潞遼沁汾民萬戶實北京○戶部尚書夏原吉言浙江台  
溫臨海等縣漁戶以罪籍沒其舊課額宜依詔書開豁從之



○修江西南昌前衛雨水壞城三百七十五丈○夜有星如  
彗盪赤色光燭地出天園西南行至近濁○戊午賜齊王搏  
書曰國家舊制王府護衛官軍止守王城今聞青州城北門  
守以護衛之人內通廣智門外接花園築牆橫截使城守者  
不得登城夜巡此何為者且聞其他不法尚多兄之愛弟所  
望令譽日彰而所聞紛紛若此能不為之投杼乎弟亦備嘗  
艱苦矣宜勉自飭勵以副同氣至愛之望其李珙等不過畏  
死假告訐以掩己非宜速發來審其虛實正之以法以杜讒  
口若復執留不遣恐啓人疑王其審之○以聞良輔為廣東




按察使良輔嘗為湖廣按察副使坐事降行人至是奉使西  
南諸蕃國還京奏事稱旨故陞用之○夜有星大如彈丸青  
白色出北落師門下流文餘發光如盞大東南行○己未命  
金吾左衛致仕指揮僉事王忠子宣龍衣陞指揮同知故指揮  
同知解唐輕子著襲父職○庚申慶王榘來朝宴于華蓋殿  
賜其從官宴於中右門○夜有星如雞子大青白色光燭地  
出紫微垣內尚書傍北行○辛酉楚世子孟烷辭歸宴如初  
至賜賚加等其從官賜鈔有差○賜麻里寬里答兒官木連  
地面哈里察籌萬戶古列太真衛指揮使阿三及西洋古里



蘇門答刺爪哇諸國朝貢之使宴○哈密忠順王脫脫遣頭  
目進馬謝恩賜之鈔幣



大明太宗體天弘道高明廣運聖武神功純仁至孝文皇帝實  
錄卷之三十七





大明太宗體天弘道高明廣運聖武神功純仁至孝文皇帝實  
錄卷之三十八

監修官奉天靖難推誠宣力輔運武臣特進光祿大夫左柱國太師英國公臣張輔

榮祿大夫少師兼吏部尚書臣蹇義榮祿大夫少保兼太子少傅戶部尚書臣夏原吉

總裁官榮祿大夫少傅兵部尚書兼華蓋殿大學士臣楊士奇資善大夫太子少傅工部尚書兼謹身殿大學士臣楊榮

資善大夫太子少保禮部尚書兼武英殿大學士臣金幼孜資善大夫戶部尚書兼謹身殿大學士臣陳山

資善大夫禮部尚書兼華蓋殿大學士臣張瑛嘉議大夫太常寺卿兼翰林院學士臣楊溥等奉

勅修

永樂三年冬十月癸亥朔享



太廟○陞金吾右衛指揮同知趙辛爲本衛指揮使指揮僉事  
高玉武全羽林前衛指揮僉事劉忠揚翔官成金吾左衛千  
戶趙信杜剛劉原趙勝王敬劉聚李得張剛方全楊璟姚成  
劉亨王興王信崔義俱爲本衛指揮同知金吾右衛指揮僉  
事李成梁山姚成俱令世襲皆以平定九門功也○乙丑命  
來朝鞞頭目阿散爲泰寧衛掌衛事都指揮僉事朶兒朶  
卧等爲衛鎮撫千戶等官八禿爲福餘衛指揮使賽因台等  
爲本衛指揮僉事鎮撫等官孟哥禿等爲朶顏衛副千戶苦  
列爲堅河衛指揮同知各賜冠帶襲衣并銀鈔綵幣有差○



賜國子監琉球四川雲南生李傑等并其從人六十三人衣衾。○駙馬都尉梅殷卒。殷字伯殷。開封夏邑人。汝南侯思祖從子。洪武十一年選尚寧國公主爲駙馬都尉。頗驕侈不慎行檢。

上即位。廷臣多言其過者。特優容之。殷與前軍都督僉事譚深。錦衣衛指揮趙曦。有隙。一日四鼓入朝。經竹橋。深曦令人捽殷墜橋下死。而曦誣奏殷自赴水死。

上疑盜殺之。命下捕盜甚急。至是都督許成發其事。

上震怒。命法司治深曦罪。賜祭殷。謚榮定。遣官治喪葬。官其二



子順昌中軍都督府都督同知景福旗手衛指揮使俱食祿不視事○丙寅蜀世子悅燠辭歸○

上嘉其純雅諭勉進學賜白金綵幣加厚其從官賜鈔有差○夜有星如盞大青白色尾跡有光出紫微西蕃外東北行○

丁卯周王橐第十子生賜名有頰○遣使齎詔撫諭番速兒米囊葛卜呂宋麻葉甕南巫里娑羅六國○有告齊王搏不軌事者遣人密察之至是還奏皆實乃封告詞示之且賜之書曰王比爲悖逆之事屢矣但兄弟至情不欲顯暴夫人孰不知善之當爲而惡之不當爲王故舍其當爲而從其所不



當爲果何恃而然。屢以書戒王。而恬不知悔。恣肆日甚。非分之恩不可數得。王其省之。毋貽後悔。○戶部言代府祿米舊歲以穀不登約支三百石。今歲豐請如舊例從之。○戊辰。周王楠遣人齎奏。深陳悔罪改過之意。

上甚喜。命侍臣封楠所奏。遣人齎示齊王。搏而賜書答楠曰。得奏具見賢弟遷善之誠。良深喜悅。兄之心惟欲與諸弟同享昇平悠久之福。使諸弟皆同賢弟此心。福慶豈有窮哉。賢弟宜益加持守。爲諸王表率。隆藩翰於國家。昭令譽於無窮。此兄之所深望。近齊王數爲不法。已封賢弟今日所陳者示之。



亦冀以興起其遷善之心。○己巳。貴州中曹水東。乖西諸長  
官司遣人貢馬。悉賜之鈔幣。○庚午。以徐銘爲山東道監察  
御史。銘初任兵部郎中。坐罪謫戍安東。至是有薦之者。故復  
用之。○法司奏貴州都指揮僉事李政挾私憤杖殺土官。當  
斬。命原其死。謫隸豐城侯李彬。令遇敵當先殺賊贖罪。無功。  
仍坐死。○辛未。慶王榘辭歸。宴如初。至厚賜賚之。并賜其從  
官鈔有差。○壬申。以秦州知州董儀爲尚寶司丞。○改四川  
成都府上流等九井。仙泉通海等三井。江安縣黃市等二井。  
南部縣福興等六井。叙州府富義等十三井。新羅等二井。潼



川州廣福等三井。捷爲縣。永通等七井。忠州涂井。雲陽縣雲安場等五井。鹽課司。俱隸四川鹽課提舉司。普濟長官司之打冲河巡檢司。隸建昌衛軍民指揮使司。○前軍都督僉事譚深。錦衣衛指揮使趙曦。謀殺駙馬都尉梅殷。伏誅。籍其家。○癸酉。設沙州衛。以歸附頭目困。即來。賈住。二人爲指揮使。

給賜印誥冠帶襲衣。沙州與赤斤接境云。○乙亥。趙王高燧來朝。○直隸鳳陽府懷遠等縣。及陝西漢中府金州言。春夏不雨。民不及耕。而秋種頗收。乞以荳麥折輸稅糧。從之。○修無爲州。周興等鄉。及鷹揚衛烏江屯。緣江圩岸。○丙子。封左



軍都督同知許成爲推忠效義宣力武臣特進榮祿大夫柱  
國永新伯食祿一千石有犯免一死子孫世襲指揮使旌其  
發譚深等之姦也命金吾左衛故千戶李質子信龐小三弟  
興俱襲陞指揮僉事○丁丑賜西洋古里蘇門答刺滿刺加  
爪哇哈密等處使臣及歸附韃靼頭目宴○戊寅賜寧國公  
主書曰駙馬梅殷雖有過失兄以至親不問比聞溺死兄甚  
疑之密訪窮搜不得其實今都督許成來首乃小人所害訊  
鞫果得其情首者已加爵賞謀陷之人悉置重法特報賢妹  
知之○



上諭禮部臣曰。自今親王來朝。初至及將歸。宴於華蓋殿。爲常禮。閒暇就宮中會宴。以叙親親之情者。不必拘也。○陞尚寶司丞朱琇爲本司少卿。鴻臚寺序班袁忠徹爲尚寶司丞。二人皆事

上於藩邸。久忠徹太常寺丞。廷玉之子云。○陞金吾左衛千戶李名道。林子宣。俱爲本衛指揮僉事。以奉使爪哇之勞也。○命浙江。江西。湖廣。及直隸。安慶等府。改造海運船八十艘。○己卯。陞錦衣衛鎮撫劉誠爲本衛指揮僉事。○秦寧。朶顏。福餘。建州。兀者等衛。指揮。章乞帖木兒等五十二人。及愷臘兒。



韃靼把禿九山韃靼野麻哈等四十五人來朝。貢馬。賜鈔幣。有差。○命通州衛指揮王立歸侍親。立滑縣人。初聞其父居鄉。病噎憂甚。剗股肉丸藥。寓歸療之。至是有司上其事。持命歸侍。仍賜立鈔六十錠。○庚辰。陞前燕府紀善胡安爲戶科給事中。命同給事中宋亨掌北京皇城勘合。○壬午。賜滿刺加國鎮國山碑銘。時其國使者言其王慕義。願同中國屬郡。歲效職貢。請封其山爲一國之鎮。

上嘉之。諭禮部臣曰。先王封山川。奠疆域。分寶玉。賜藩鎮。所以寵異遠人。示無外也。可封其國之西山爲鎮國之山。立碑其



地。

上親製碑文曰。朕惟聖德之君。大有功於天地者。範圍參贊。相協陶甄。日月星辰以之明。寒暑歲功以之成。天得以爲天地。得以爲地。各位其所。而由寧。萬物由是而化生。是其一心之運。經綸之妙。有出於天地之外。而大於天地者。不可以名言也。昔朕

皇考太祖聖神文武欽明啓運俊德成功統天大孝高皇帝。以聖人之德居聖人之位。爲三才之主宰。和調陰陽。保合造化。貫通宇宙之中。包括天地之外。智無不周。動與神會。凡在天



地之中。有生之類。莫不陰受其賜。自生自育。而不自知。四十  
餘年於此矣。朕纘承鴻業。祇迪先猷。膺茲福慶。嘉會萬邦。乃  
永樂三年九月。爾滿剌加國王遣使來朝。具陳王意。以謂厥  
土協和。民康物阜。風俗淳熙。懷仁慕義。願同中國。屬郡超異。  
要荒永爲甸服。歲歲貢賦。頓首請命。純誠可嘉。寔朕

皇考餘恩。淑慶延及。爾土用致於斯。遠惟古先聖王。封山奠域。  
分寶賜鎮。寵異萬國。敷文布命。廣示無外之意。其封滿剌加  
國之西山爲鎮國之山。錫以銘詩。勒之貞石。永示其萬世子  
孫。國人與天無極。詩曰。西南鉅海。中國通輸。天灌地億。載同。



洗日浴月光景融。兩崖露石草木濃。金花寶鈿生青紅。有國  
于茲民俗雍。王好善義思朝宗。願比內郡依華風。出入導從  
張蓋重。儀文楊襲禮虔恭。大書貞石表爾忠。爾國西山永鎮  
封。山君海伯翕扈從。

皇考陟降在彼穹。後天監視久益隆。爾衆子孫萬福崇。禮部  
進冕服鹵簿儀仗圖。并洪武禮制禮儀定式。禮制集要稽古  
定制等書。

上曰。議禮制度國家大典。前代損益固宜參考。祖宗成憲不可改更。即命頒之所司。永爲儀式。迺北指揮哈



刺張等貢馬。賜銀鈔綠幣。○雲南波勒土官麻哈旦。麻刺。吒。并八百者。乃土官刀招你等。遣頭目乃三哈柯等。奉金鏤表。文貢金結絲帽及方物。賜鈔文綺有差。○癸未。趙王高燧還北京。錫賚特厚。賜其從官鈔有差。

皇太子宴餞于江東驛。○賜鞵鞞歸附頭目及波勒土官宴。○夜有星如盞大。青白色。出紫微垣內。東北行至游氣。○甲申。復以平定九門功。陞右軍都督府都督僉事高成爲都督同知。金吾右衛指揮使趙辛爲山西行都司都指揮同知。指揮同知高玉爲陝西都指揮僉事。武全爲陝西行都司都指揮。



僉事。指揮僉事梁山李成俱為本衛指揮使。羽林前衛指揮  
同知劉忠為山東都指揮僉事。揚翔為河南都指揮僉事。官  
成為山西都指揮僉事。金吾左衛指揮同知王敬。劉聚。李得。  
張剛。方全。楊璟。姚成。劉亨。趙信。杜剛。劉原。趙勝俱為本衛指  
揮使。王興。王信。崔義及指揮僉事姚成俱為羽林前衛指揮  
使。○陞鴻臚寺卿樊敬為廣東布政司左叅政。光祿寺少卿  
李偉為鴻臚寺卿。鴻臚寺司儀署丞周昇為右寺丞。○乙酉。  
賜山西等都司及金吾右等衛指揮千百戶脫火赤等百九  
十八姓。○丙戌。設雲南洱海千戶所。



上諭兵部臣曰。往者以官軍不用心牧馬。勅太僕寺及諸衛所  
委官董其事。年終具實來聞。然雲南遼東四川兩廣道遠。往  
復經年。必妨職務。其令原管官三年一赴京考較。如託故轉  
遣人及孳息不如數者。罪之。○夜月犯謁者星。○戊子。賜周  
王橐等

皇明祖訓。且諭之曰。

皇考所以垂訓子孫。至要之道。具在此書。朝廷常守之。可以永  
安。

宗社。藩王常守之。可以長保富貴。朝廷與藩王本同。



祖宗所出。但能皆以

祖宗之心爲心。則自然各盡其道。前代有帝王不能保全宗室者。如宋太宗。亦有宗室不能自保全者。如周三監漢七國。此皆是不能以祖宗之心爲心。朕與諸弟各勉之。時楠子衆。特賜十本。○置北京武清衛經歷司經歷一員。○直隸宣州衛言雨水壞城垣七十餘丈。請命修築。從之。○庚寅。設海刺兒千戶所。以來朝野人頭目把禿等爲千百戶。賜誥印冠帶襲衣及鈔幣有差。○夜有星大如鷄子。青白色。有光出內階。北行入北斗。○辛卯。擢桂林中衛經歷仲謙爲光祿寺丞。○復



四川布政司右叅議時中官中初坐罪當謫戍邊上書陳情願改過遂命爲行人至是出使琉球還故復其職○以前福建按察僉事陳灝江西按察僉事裴璉雲南按察使姜滌陝西布政司左叅政李賢禮部主事范敬先北流知縣李祥御史徐敬縣丞曹貴俱爲監察御史灝等先皆坐罪謫戍興州至是有薦之者故悉召用○命故千戶趙才興子甫襲陞金吾左衛指揮同知○壬辰夜有星如鷄子大青白色有光出八穀西北行入天鈞




大明太宗體天弘道高明廣運聖武神功純仁至孝文皇帝實  
錄卷之三十八

NATIONAL CENTRAL LIBRARY, TAIWAN, R.O.C.



國家圖書館, NATIONAL CENTRAL LIBRARY, TAIWAN, R.O.C.





大明太宗體天弘道高明廣運聖武神功純仁至孝文皇帝實錄卷之三十九

監修官奉天靖難推誠宣力輔運武臣特進光祿大夫左柱國太師英國公臣張輔

榮祿大夫少師兼吏部尚書臣憲義榮祿大夫少保兼太子少傅戶部尚書臣夏原吉

總裁官榮祿大夫少傅兵部尚書兼華蓋殿大學士臣楊奇資善大夫太子少傅工部尚書兼謹身殿大學士臣楊榮

資善大夫太子少保禮部尚書兼武英殿大學士臣金幼孜資善大夫戶部尚書兼謹身殿大學士臣陳山

資善大夫禮部尚書兼華蓋殿大學士臣張瑛嘉議大夫太常寺卿兼翰林院學士臣楊溥等奉

勅修

永樂三年十一月癸巳朔欽天監進永樂四年大統曆



上御奉天殿受之。頒賜諸王及文武群臣。暹羅國王昭祿群  
膺哆羅諦刺遣使柰婆郎直事。剃五十人來朝。貢方物。賜之  
鈔幣。夜金星犯水星在箕度。甲午冊營國威襄公郭英  
女為郢王棟妃。左軍左都督劉貞女為伊王橈妃。蒲州知州  
王綈女為永和。王濟煨妃。加封信安伯張輔為奉天靖難  
推誠宣力武臣。特進榮祿大夫柱國新城侯。食祿千五百石。  
子孫世襲。雜犯死罪已免。二死子免一死。蓋

上嘗問淇國公丘福成國公朱能曰。奉天靖難功臣皆已報之。  
衆議謂何。二人對曰。爵賞之頒皆極公當。但有過之無不及。



者惟張輔之封衆心有所未愜。蓋其父之功已高，使不死臣等今日當讓之。况輔從征之功亦多，外人皆謂

陛下以皇親故抑之，似有虧於公道。

上曰：卿言誠是，遂命加封。○遣都督徐膺緒、禮部左侍郎趙抃持節齎誥，劄詣甘肅封總兵官平羌將軍、後軍左都督宋晟為推誠輔運宣忠効力武臣，特進榮祿大夫、柱國、西寧侯。後軍都督府左都督如故，食祿千一百石。子孫世襲。雜犯死罪，本身免二死，賜膺緒鈔四十錠，抃鈔三十錠。○修廣東肇慶府四會縣鷓鴣水等處堤岸。○乙未，齊王搏上表悔過謝罪。



賜書答曰覽表云繼今改過不敢復為不義詞意懇至深慰  
吾意兄弟之情豈有他哉但欲相與同享富貴保令名永終  
不墮耳吾弟勉之今後護衛人犯法須如律處治若非王府  
之人有犯須歸有司王府不得干預將來吾弟所行皆善其  
樂不可言而兄亦與有保全骨肉之美吾弟勉之○陝西西  
安府三原等縣言連歲夏旱所徵稅糧乞以麥豆折輸從之  
○丙申勅鎮守雲南西平侯沐晟曰爾鎮雲南倚託甚重豈  
可輕動比令爾調兵近老撾屯駐爾輒親行非朕意也勅至  
即還爾又言欲發兵向安南朕方以布恩信懷遠人為務胡



登雖擾我邊境。今已遣人詰問。若能據誠順命。則亦當弘包  
荒之量。○丁酉。命浙江。江西。湖廣。改造海運船十有三艘。○  
夜有星如盞。大赤色。有光出中天雲中。西北行。○戊戌。襄城  
伯李濬卒。濬。和州人。少事

上。藩邸為燕山左護衛千戶。

上初起義。濬招募薊州永平壯勇數千人來附。濬負氣果敢。每  
戰奮勇而前。垠上之戰。率壯士突入敵陣。衆鼓譟乘之。敵敗  
走。小河猝遇敵。率敢死士先據河橋。斷其路。敵不敢迫。大軍  
繼至。遂大敗之。以功累陞都指揮使。封襄城伯。永樂元年鎮



江西尋召還。至是以疾卒。

上輟朝二日。賜祭及賻。命有司治喪葬。○太原左前衛總旗靖西京驢等以告謀叛。得實。陞百戶。仍各賜銀五十兩。鈔百錠。綵幣二表裏。衣一襲。○夜有星如盞。大赤色。光燭地。出勾陳西北行。一小星隨之。○己亥。裁減湖廣岳州府臨湘縣縣丞主簿。○庚子。以施禮為山東道監察御史。禮。洪武中嘗為河南布政司左叅議。坐事落職。建文中舉為淮安知府。復坐事。謫戍邊。至是有言其廉者。遂召用之。○遣書諭趙王高燧曰。朕居北京二十餘年。每有邊報。但令謹守地方。未嘗遣人輕



出。昔中山武寧王開國元勳，亦惟嚴守邊境，防慎出入，故無  
敗失。今邊烽有警，爾輒遣人出視，輕率不慎，自今宜切戒之。  
凡遇警急，但令嚴固守，備勿輕出兵。○辛丑，勅武安侯鄭亨  
統率北京步騎三千，并永平立功官軍，於宣府操備，節制宣  
府、萬全、懷安、隆慶、興和諸衛。○日本國王源道義遣使源通  
賢等奉表貢馬及方物，并獻所獲倭寇，嘗為邊害者。

上嘉之，命禮部宴賚其使，遣鴻臚寺少卿潘賜、內官王進等賜  
王九章冕服、鈔五千錠、錢千五百緡、織金文綺、紗羅絹三百  
七十八匹。○乙巳，撫安江西給事中朱肇言先因九江、南康



二府多荒閒田。令有司召致各府縣有丁無田及丁多田少之民。任使開墾。今南昌等府民自願開墾者三千七百八十七戶。實墾田千二百九十七頃三十七畝。

上曰此未可遽信。或肇虛增其數。以希進用耳。久當驗之。蓋肇為人輕妄刻薄。其為此舉也。威迫郡縣。欺給百姓以從之。其實不過二千人。歲餘逃亡幾半。皆如

上所料云。○丙午。淳泥國麻那惹加那乃遣使臣生阿烈伯成等奉表貢方物。命禮部宴勞之。并賜文綺襲衣。○丁未。夜月犯井宿西扇北第一星。○戊申。夜有星如雞子。大青白色。有



尾跡出郎將傍北行文餘發光如碗大至近濁○己酉命故  
都指揮僉事王觀童子忠襲金吾前衛指揮僉事○癸丑夜  
有星大如碗光燭地出中天雲中西南行至雲中○甲寅冬  
至○

上御奉天殿受朝賀大宴文武群臣及四夷朝使命婦朝

皇后于坤寧宮錫宴○遣駙馬都尉沐昕賜周王橐羊百牽酒  
三百瓶○行人譚勝受等使舊港還以頭目梁道明鄭伯可  
等來朝貢方物賜道明等襲衣及鈔百五十錠文綺十二表  
裏絹七十匹○乙卯旌表江陰衛軍丁徐佛保孝行佛保母



病篤醫弗能痊而剖脇剗肝煮液以進母食之頓愈其衛官以聞遂有是命○丙辰賜琉球國中山王世子完寧斯結及遼東那兒河歸附女直野人頭目宴○建雲南大理銀冶命所司定額督辦○丁巳命金吾左衛故千戶靖僧兒子興襲陞本衛指揮僉事○戊午賜谷王穗袞服一襲○夜月犯西咸南第一星○庚申命羽林前衛故指揮同知師玉姪榮襲陞本衛指揮使指揮僉事潘成子安襲陞本衛指揮同知魏成兒子讓襲本衛指揮僉事千戶杭貳子英李得姪英金吾左衛千戶胡改僧子政梅安兒子受各襲陞本衛指揮同知



王興子智林友才子亨黎肆子貴趙群兒子能林原子青金  
吾右衛千戶革狗皮子勝脫譚子千家驢劉大子全各襲陞  
本衛指揮僉事

十二月癸亥朔。

上視牲南郊。遣使齎詔封淳泥國麻那惹加那乃為王。給印  
誥勅符勘合并賜之錦綺綵幣。甲子。免泗州陵戶單仲一  
等租稅。泗州

祖陵。洪武初設守陵三百十四戶。後有戶絕者。至是以仲一等  
補之。而循例免租稅云。以辛彥博為山東道監察御史。彥



博先任淞江按察使。坐事謫戍興州。至是有言其才者。復召用之。○乙丑。進封寧國公主為寧國長公主。○浚淮安府支家河。長一萬一千九百七十丈。○戊辰。鎮守雲南西平侯沐晟。奏奉命率師及車里諸宣慰兵。至八百境內。破其猛利石厓及者答二寨。又至整線寨。木邦兵破其江下等十餘寨。八百恐懼。遣人詣軍門陳詞伏罪。臣等恪遵勅旨。駐兵不進。其車里等宣慰擬各班師。并以八百所陳詞奏聞。遂遣勅諭車里木邦宣慰使。乃暹答波勒孟良等土官麻哈旦麻刺吒等。曰。曩者八百不恭朝命。爾等請舉兵誅。嘉爾忠誠。已從所請。



今得西平侯奏言八百已伏罪納款夫有罪能悔宜赦宥之  
勅至爾等悉止兵勿進又勅西平侯沐晟等班師○已巳賜  
周王橐金織袞龍綵幣三十匹良馬十匹及羊酒等物○夜  
金星犯壘壁陣西第三星○庚午臘日賜文武群臣宴○那  
兒河野人頭目佟苦不花忽里哈頭目亦稱哥建州衛頭目  
王古驢等百二十三人来朝賜銀鈔綵幣有差○辛未命戶  
部全給中軍都督同知梅順昌孝陵衛指揮使梅永貞旗手  
衛指揮使梅景福月俸米順昌等皆寧國長公主之子  
上憫其父駙馬都尉梅殷之死故優之○癸酉實授李玫為福



建布政司左叅議。洪武中署福建左叅議事。建文時坐罪降蒲城縣丞。丁母憂去官。至是服闋。故實授舊職。○裁減湖廣嘉魚縣縣丞主簿。增置山東恩縣縣丞主簿。○陞通州衛指揮使湯銘為山東都指揮僉事。○陞都指揮僉事劉青為遼東都指揮同知。蕭授為都指揮同知。指揮使徐良為都指揮僉事。俱掌常山中護衛事。宋成為都指揮僉事。掌常山右護衛事。○以故金吾左衛指揮僉事完者不花子阿魯反襲本衛指揮僉事。○命遼東都指揮僉事楊義陝西都指揮同知彭成致仕。○爪哇國西王都馬板遣使阿烈安達加李奇



等來朝貢方物。皆賜冠帶襲衣。○甘肅總兵官西寧侯宋晟言哈密歸附頭目買住察罕不花等二百七十八戶。居苦峪里告飢。乞以預備倉粟賑濟。從之。○甲戌陞吏科右給事中孫璘為本科都給事中。○疊州頭目谷奴堅督等十人來朝。賜鈔幣襲衣。○毛憐等處野人頭目把兒遜等六十四人來朝。命設毛憐衛。以把兒遜等為指揮千百戶等官。并賜誥印冠帶襲衣及鈔幣有差。○乙亥勅廣西總兵官征南將軍都督同知韓觀曰。今以都督僉事黃中充左副將軍。呂毅充右副將軍。贊爾軍事。○甘肅總兵官西寧侯宋晟奏欲遣人通



問逸北鬼力赤及馬兒哈咱等以宣示朝廷禮待遠人之意。從之。仍給織金文綺綵絹四十匹以資其用。○丁丑安南胡奩復遣阮景真等隨行人聶聰等來朝。奏曰。伏蒙勅書諭使。攄誠臣對越天地。敢有二心。所或携貳。明神殛之。今遣陪臣阮景真等恭賀正旦。且迎還天平。臣亦當率國人逆於境上。而行人聶聰等亦力言奩誠心恭命。

上許之。○庚辰勅安南王孫陳天平曰。前得胡奩奏。深自改悔。請迎還爾。以君事之。朕以一國不可二主。慮奩不實。再使往問。許以上公封之大郡。今奩復奏。誓無二心。仍遣阮景真等



迎爾。奎謂當躬迎於境上。朕惟道貴適中。禮有從宜。今遣廣西總兵都督黃中等以兵五千納爾于國。其治任以行。勅廣西總兵官征南將軍都督同知韓觀左副將軍都督僉事黃中右副將軍都督僉事呂毅。今安南胡奎遣使來迎前國王孫陳天平歸國。以君事之。朕推誠待物。茲特遣還爾等選兵五千。黃中呂毅將之。待天平至。送之還國。尤宜審度事。幾以為進退。不可輕忽。○辛巳。勅鎮守大同江陰侯吳高寧夏總兵官左都督何福曰。近伯客帖木兒弟歹必都驢來言虜寇議舍甘肅來春徑掠寧夏大同。其言雖未可信。然宜嚴兵



待之所謂有備則無患也。又勅甘肅總兵官西寧侯宋晟曰。虜雖云不至甘肅。然同類有在甘肅。其間豈無與之同心者。且聲東嚮西。兵家之常。不可不備。○壬午。爪哇國東王字令達哈遣使馬刺真等貢神鹿。○乙酉。

上謂兵部臣曰。河州洮州西寧諸處與西番易馬。朝廷本推誠撫納。遠人皆與好茶。聞近時守邊頭目人等多用惡謬茶欺之。甚者侵損其財物。彼雖淳厚。不肯陳告。然心未必能平。來年其遣金牌信符給西番為驗。使比對相同。即納馬。如洪武中例。不可後期。仍榜諭邊地官民。以朝廷懷遠之意。今後馬



至必與好茶。若復欺之。令巡按監察御史采察以聞。○都察院奏奉命詳定原議笞杖徒流罪條例。斟酌適中。以聞。今議徒流罪。發充恩軍者。於長安左右門造守衛官軍飯。於漢趙二府牧馬。不充軍者。充國子監膳夫將軍軍伴。土工。或於北京為民種田。於遵化炒鐵。或自買船遞運。或擺站運鹽。笞杖罪止鑄錢准工。從之。○丙戌。夜。月犯罰星中星。○戊子。琉球國中山王武寧。山南王汪應祖。山北王攀安。知西番馬兒。箴等簇。四川貴州諸土官。各遣人貢方物。賀明年正旦。○己丑。浙江右叅政劉思忠言。紹興府曹娥。埧江沙淤塞。難通舟楫。



去垣東三里許通江甚近乞移置為便從之○庚寅夜有星如盞太青白色光燭地出天廩西行至游氣○辛卯享

太廟○是歲天下戶九百六十八萬九千二百六十口五千一

百六十一萬八千五百賦稅糧三千一百一十三萬三千九

百九十三石布帛百三十二萬九千五百七十九匹絲綿二

十一萬三千五百六十三斤綿花絨五十一萬四千一百一

十三斤課鈔六百六十萬七百二十錠金五十兩銀八萬二

千一百四兩銅二千四百三十斤鐵七萬五千七百二十斤


鉛三萬九千九百八十五斤硃砂二千八十兩海肥三十三



萬四千一百四十三索。茶百七十七萬一千三百四十九斤。  
鹽百三十二萬九千五百七十五引。屯田子粒二千二百四  
十六萬七千七百石。馬五萬八千五百九十九匹。



大明太宗體天弘道高明廣運聖武神功純仁至孝文皇帝實  
錄卷之三十九



NATIONAL CENTRAL LIBRARY, TAIWAN, R.O.C.